

筆記小說大觀

集

壺

天

錄

下

進步書局校印

平定山記

卷一

天

地

卷二

壺天錄卷下

淮陰百一居士著

天道遠神道邇亦鑒觀乎人之賢否以為勸懲耳故凡名世賢臣無不得神助者上海喬潤齋中丞撫湖南時德澤在人口碑載道逸事頗夥靡有能詳述者當其未遇時鬼神呵佑甚奇友有客上海者得其詳告于余余異而識之中丞少苦貧或午刻由塾歸灶突無烟慰父母曰師已食我仍返塾弱冠遊邑庠授徒不足自給繼室張夫人紡織以佐遇秋試輒不能往丙辰歲僅持錢八緡往同伴恐為累預約出闈先行中丞於十六日晚始歸寓時已不及而囊底罄竭一錢不名矣中丞素擅岐黃術乃張貼行診應手輒效凡至病家率聞鬼語曰喬大人來謹避謹避緣是歸資粗足時近榜期姑緩歸榜發同人皆落惟中丞獲雋尹文端公時制兩江素稔中丞名見與鹿鳴宴驚異之厚贈而歸中丞躬自襁被手持一緡行于出水西門薄暮冥冥呼船搭之忽見有峨峨官舫停泊江干旂幟燦列舟子揺手禁勿聲令中丞處舵尾一艙暗黑無燈燭但聞風濤洶湧聲勢激蕩尋亦酣寢質明舟子呼曰起至矣促登岸惶遽中遺緡于艙回顧官舫渺然不見矣自維舟子既不索值千里金陵以一夕至奇異方甚後至邑廟見神舟舵尾遺緡在焉乃恍然知神助致敬盡禮而返逾年成



進士仕至湖南巡撫當其始也被友所紿方謂窮途無告乃天卒相之以醫得能以文得名神復助之以歸非公之德藝有足以格乎天神者曷由致此彼小人慳吝之心豈足以測君子哉棄友而先行亦友道之變也其遭擯斥也不亦宜乎

人之投冥詞者多矣有杳茫多年而迄無靈響者亦有倉卒暫時而即奪壽數者如儀徵邑令周明府霞軒可異焉按明府諱昂駿年甫四十二歲向預揚州郡發審差精明強幹厯辦疑難案件為江北第一幹員大府皆倚重之光緒辛巳歲九月疾終任所凶耗一傳上下同聲惋惜以為才長命短天不假年耳不知其命之促者實由其兄與其戚共遞冥詞也緣明府昆季四人明府居次其兄弟皆操申韓術且有捐雜職需次蘇省者聞明府調篆如臯伯與叔皆棄館來儀明府屬兄逸帆以捐務漕穀屬弟捷三以帳房瑣屑弟之妻兄高星聯艱生計奉其母帮妻倪氏來儀相依時儀邑紳耆醵金脩邑廟明府以弟督其工弟轉囑高君終辦廟工既竣逸帆忽得浮言高乾沒捐欸若干播揚署內高憤極亦指出逸帆某公事得若干互為攻訐至於相毆交訴明府明府不敢論曲直命明心于隍神乃各具訴投之是晚捷三即見有二役持帖云明日請在大殿算核工帳三茫然正欲詳詰而人已杳矣以名帖詢人有老隸驚云此即本縣城隍神名也三懼甚夜半高忽延捷三至榻前並呼其妻至曰

我將死死後汝須為我明冤否則追汝命耳。翌午狂叫而逝。明府厚為殯殮。高妻素懦無法報復。抱恨飲泣。旋吞芙蓉膏而死。高母年已就邁。勸子媳偕亡。且斬宗祀亦自盡焉。未三日捷三遇風疾卒。明府因制軍過境。迎於江口。墮馬入水。田掖起之。更行。又墮於溝港。謁見時語多不經。制軍以其病也。溫語慰之去。不三日亦卒。捷三歸亦發狂。跳躑自刖。皆高氏三人之言。越數日亦死之。是役也。高與捷三固皆局中人也。死而就判。理或宜然。明府何與焉。高君一死。至於母妻俱亡。冤孽重疊。明府身為司牧。先事既覺。察不及後事。又斡旋不能。神故示之罰。而奪其壽歟。吁可慨也已。

生人為陰曹決獄事。裨官野史說之不一。然實未見其人也。大要皆聰明正直之人。始克為之。有友述二事。一為謝給諫增江都人。某春病劇。危昏瞶中。忽見青衣數人。踞前請蒞任。車馬儀從皆列於門外。遂隨之。出坐肩輿。前導旗蓋。彷彿府縣鹵簿。經行之路。率皆昏黃大漠。杳無天日。無何至一衙署。宏潤壯麗。呵導而入。坐堂皇。胥役各執簿侍立。時則堂之上下寂無聲。俄頃有朱衣吏執簿入。置座上。謝披閱。皆水却人數。吏復取硃筆請點。謝不能自主。遂按次點之。既畢。事從人復請謝出。景狀如前。見旁跪褚衣犯累累。亦不敢問。頃抵家。入門遂醒。汗溢淋漓。病頓瘳。人皆謂謝公暫署城隍也。其一為范公諱蒙正號木童。為豐邑諸生。庠



序有名平生以正直聞訓俗型方綽有古風踵門請業者無虛日僅收養膳資哺脩雖微必卻詩書之外兼課以敦品勵節從游者多所造就而家徒四壁晏然自樂也有時安睡恒一二日不覺戒家人弗驚動蓋神往冥間判事也友人顧姓者知其事請於公乞與偕遊公難之堅請始可一日邀顧同寢遂偕往焉厯觀廬市無異人世至一署勢甚炫赫公令守於門外戒弗亂走俟理事畢後再與同游遂入少頃公出竟不見顧遍尋無踪始踴躍獨返顧仍卧牀頭若僵公甚錯愕忽憶辦公事時曾有五妓投生畜道判往裏塔處所方疑顧見色起心尾之而去遂往裏塔逐家究問有新產牛羊犬豕否旋有農家答以昨晚五更新產六豕公曰是矣啟筮細觀果五雌一雄公遂以千錢購一雄歸就顧牀頭撲殺之而顧乃如夢醒矣公曰幾誤大事後公臨終數日前先與戚友話別至期無疾而卒異香滿室嗟乎生為聖人歿為明神此理之常也至以生人而攝神道之事則其人之聰明正直更可知矣若顧非范公拔置不將終淪畜道邪信乎生死關頭人禽界判一念之邪即入孽障不亦危乎其微哉

欺誣負約之情加諸同類猶或有時而受懲創者況於神乎甯波嚴福祥者白銅船主也由閩省運木赴申江駛至吳淞口潮落水淺停阻難進舟師水手計數十人枯坐以待殊苦岑

寂船主向有烏烟癖高枕橫牀矮燈短竹消遣無聊惟事烟雲供養耳朦朧間忽見一古衣冠人儀容秀偉隱約在前頓悟舟中無此人必神靈示異肅然起敬整衣默祝曰苟荷神祐進口銷貨謹具牲醴以酬未幾默助帆風果獲洽願遂循舊規齎獻天后而在舟所許之願竟置罔聞是夕方團聚飲福船主偶出戶外若有人攫置波中者隨流而逝不及救矣噫赫赫神靈其可戲渝之耶神固不以此置之死要其平日欺誣之罪取死已非一端特假神以顯其惡耳觀乎此吾甚為天下之負約者危

揚城舊有勅建李公祠牆宇宏峻並有園亭之勝按李公祖孫祖為明季忠臣孫為康熙名臣祀典所載固彰彰也咸豐時祠宇完好兵燹後幸未燬而神牌已失李氏子孫俱死於城於是不逞之徒屬集其中有吳六者運署猾吏也其屬羣小獨居其屋吳旋因案死園園吳之寡妻據為己產招無賴分居之收其息詎賃居者益見怪異不數月輒徙去成衣匠王姓亦賃東廂者一夜偶出戶忽見牆角立一人疑為賊叱之其人乃伸腰漸大與簷齊捺王至地以土塞口倒置享堂屋側王昏不復知人事久之眾始知急救乃甦次日遷去又一曹姓業屠沽醉後謾罵自詡胆量云王某不武如我何懼之有言未畢忽跪地崩角無數流血浹面泣稱知罪自掌其頰旋躍登几上盤膝踞坐口作梵音云我祖孫相承忠孝節義為國家



重臣蒙恩血食於此。今為爾等汗穢業已難堪。祇以小人不足較姑置之。乃肆詈罵。實不汝容矣。於是合祠之眾環向跪求。具限各遷徙。久之寂然。曹自几上跌下。如夢方醒。問所見。則一紅袍紗帽者。一紅頂袍掛者升堂。即昏無知覺。夫忠臣名宦之祠為人佔踞踐踏。固有任其咎者。至於靈爽在天。豈屑與較論耶。抑乖氣致戾。遂使邪物託名以懲創之耶。俟有道以質疑可耳。

慢神取禍。既有明徵。乃又有藉神惑眾而斂財者。亦國法所難宥。揚之西門外元寶塘固小村落也。里有張某業籊桶。夫婦皆半百。一子為隣村牧牛。性慧而狡。一日牧牛歸。忽大言於眾曰。我今與仙姑遇。傳我仙法。能治百病矣。黠者詢仙姑來歷。則言是城隍夫人使女。今來人間濟世。非有緣者不度耳。正言間。忽作色曰。仙姑來矣。眾聞而懼。膜拜於地。咸請現色相。牧童即麾手曰。起起。緣尚未到。且俟百日後。即與汝等遊戲矣。惟現奉夫人命。施符濟世。如不信。即領病者至。遲則去矣。病者至。童即索筆書符。焚水碗中。飲之曰。明日愈矣。果痊。於是城廂中外。轟傳仙姑治病。求符水者。絡繹不絕。得資甚夥。且有以肩車逐之者。舉國若狂。僉謂仙姑靈甚。甘泉邑侯某聞之。突將童及父母繫繫轅下。坐堂皇。既責童之父母。乃重責其子。其父母泣而言曰。仙姑害我。猶以為仙姑與其子。殆二而一。一而神者也。邑侯怒。復重責。



其子而逐之。羣謠遂息。吁。童之罪無可逭。彼父母固實受其子之累。乃至公庭被杖而復不悟。愚夫愚婦亦可哂已。

寓人徐某。寄籍於滬。有年矣。家僅一傭婦。後又有邱姓者。暫下榻其室。一日徐妻忽於內室失去飾件。約值錢百緡。密察無跡。固知為熟識者所取。事無佐驗。碍難指斥。遂邀江湖客擅圓光術者。如法試之。客乃自炫其術。神光一道。撫弄於燭花香篆間。徐令兒曹認識之。形影中若現一人。似同寓之王某狀。徐詰王。王茫然。徐以圓光告王。無以白。願偕諸人赴邑廟設誓。乃各具楮往。徐為前導。出素紙三條。取一條書賊字。祝告既已。令同人各拈一條。卒之得賊字者。乃傭婦也。婦亦慚懼。不諱曰。物具在。願如數奉償。歸檢原物。則出於廚房柴堆下焉。嘻。以杳茫無稽之說。而冤人可乎。此一事。此婦固黠矣。徐亦智矣。乃終藉神之靈。懲奸發覆。以白王冤。信乎。神明難欺也。

明有天地。幽有鬼神。鑒觀甚不爽也。而在宵小。勤竊之徒。則固不畏矣。揚郡守黎公。接篆日。大小屬循例謁賀。有某縣丞者。候補多年。一差未獲。貧窘特甚。亦從友假公服。既畢事。解衣返趙。適一寅僚至。遂出見。迨客去。而公服已烏有矣。憤恨欲死。以咎僕僕無計。潛叩於都土地祠。涕泣而返。甫入門。見一人肩衣包。汗浸面。踉蹌而至。檢視衣包。則完璧固在也。詢之則

曰。我伏牀下久矣。趁僕出沽茶時。席捲而出。正與某舖議售心神顛倒。不知何由而至此也。僕以為土地神靈使然。主人乃歎惜。麾之去。噫。神道設教。聖王不廢。乃竟有顯應若是者。失而旋得。夫復何求。主人固善於周旋矣。殆亦感悟其心之一道歟。

徐生名海。江西廬陵諸生也。父經商。往來西蜀。素敬事呂祖。數十年如一日焉。會舟由川江而下。泊船於巫峽間。有道人附舟。徐見其儀表俊逸。諾之。越日。聞前途寇氛大懼。道人曰。是不必憂。吾有小術。可以避。乃戒舟人屏息。卧勿作言語。探小囊。出黃土三撮。置諸鷁首。俄頃賊至。舟人伏篷底。手足戰栗。竊從篷隙窺之。見隣舟俱為賊刦。且往來於江岸上。曰。曩見貨舟泊此。何忽逃遁。遂去之。道人拾黃土入囊。戒舟人往漢口。後徐海妻黎氏生二子。令婢撫之。婢出門。見有水面浮針者。歸效其術。以斷針置茶碗。忽聞主婦喚奔入。忘却碗中物矣。至夜。黎氏渴甚。即舉茶碗吸之。盡針橫梗喉中。水漿不入口者三日。勢瀕危。往呂祖殿乞籤歸。至中途。觸一人仆於地。問倉急何為。徐告以故。其人曰。是不難治也。子歸。速以羅漢豆為糜。和以寸度韭葉。用豬脂熬熟食之。三日後。必無患。徐心急。不暇問姓氏。如法制服。甫下咽。而痛止。又越日。針隨韭葉大解下矣。此神之靈感也。如此方者。果可以治此病乎。則不得而知。昔神鼉山為松郡九峯之一。有羽士金太者。精玄理。終日默坐。不與塵世交。爨下僅一僧。金



善視之時提軍尤公海如年近期父迫欲抱孫聞金道術屏除騶從單騎造訪既白來意並許重新廟貌金俯想移時約翌日報命次晨商於僧搏土成一孩束以紅綾送赴行轅軍門喜甚禮待之未幾家媳孕竟產一男軍門乃挈金二千登神臺踐舊約鳩工庀材不給於用後求僚屬襄助不逾年琳宮紺宇金碧一新神臺山遂稱名勝金名亦由是大噪會歲旱郡守以金有異術乞禱甘霖金有難色俾來敦促不獲已乃以告爨下僧僧曰當速去明日可得雨金叩以故僧曰去便去耳母聒人耳余言不汝欺也金登壇叩禱如期果應田禾沾足額手相慶郡守令送金歸僧候門頻問相視而笑後數日金閒游泖濱有漁者語金曰曩見汝廟一僧獨泛小舟手攜銅鏡一具以筆醮墨塗鏡而置之船唇仰天呼嘯如是者約炊許及僧打漿歸而空中黑雲四布大雨傾盆矣汝其知之否金聞言遽返尋僧則如天外飛鴻去之冥冥矣神龍見首不見尾意仙之游戲人間乎

甯波湖西某生風流倜儻一夜在妓館徵歌逐舞方極其樂忽暈昏不起俄而遍身青紫昇回家自言有二女鬼來纏哀號遂絕先是其鄰人半月前死而復蘇謂見城隍牌示有生名言畢仍逝生果暴卒羣以為必有陰譴也生究作何孽未有能道其詳者又湖州某歲三月官祀蠶神有某工四鼓時赴廟伺役廟與獄廟相隣某工於廟前閒步忽見獄廟燈燭輝煌



人聲嘈雜有告以將審案者徑趨殿角覘之上坐者面目不甚了了。階下有囚跪焉一則不相識一則開珠寶店之某翁也。方駭異間供亦不能諦聽。但猝見猝見猝翁油鍋有頃取出置之石灰桶內某工不忍見趨出恍如夢回望廟中昏黑如平日而官之前騶亦到某事畢歸而述諸同夥人皆斥其妄不三日某工竟死知之者始竊然疑之。翁果患病增劇不數日亦死。下體腐爛一如火灼者然翁平日亦無甚惡蹟為死前一年洞庭山某氏婦囑女媼私帶珠寶來湖變買媼與眼鏡店主相識挽渠引之珠寶舖議定價值千餅洋蚨先給百餅餘彙以票約遲日來取媼附舟回山甫出太湖口舟覆媼溺死屍為人撈起翁聞是信急赴屍所於媼身畔搜得票據以歸酬眼鏡店主百元事遂寢某婦聞媼已死珠寶無着懊恨自縊而翁乃安享其利矣翁雖非謀財害命而果不取其票媼雖死婦固未嘗無生機也翁固知有買主在賄眼鏡店主以減口其計可謂狡且毒矣。冥誅之受亦宜然耳。至某生無疾而卒想亦非孽之小者舉頭三尺昭布神明試問造作孽業者果何益耶。

正直為神慈悲為佛。自浮屠設為禍福之說於是塵世擾擾半皆佞佛即夙昔靡惡不作者但謂奉佛何罪不消何福不至是直以佛為惡人之護身符矣。誣妄可哂滄瀆六月十九日相傳為觀音誕辰虔奉者或涉南海普陀或赴西湖鷲嶺大率皆善男善女耳忽有鵠姬

六人約伴赴杭其姓則曰黃曰洪曰李曰麥曰陳曰蔡各持一瓣之香兼玩六橋之景既畢事返棹中塗六姬同病竟亡其四其二人抵滬亦奄奄待斃人或歸咎於佛之無靈不知天堂地獄本諸方寸佛門雖曰廣大倘糾其平時積惡能即以進香免禍而獲福乎昔劉誠意有云不論是非雖在窮光極惡佛無不引手援之者則以情破法矣夫法出於帝而佛破之是自獲咎矣然則六人之死亦死其所當死耳何咎乎佛。

禦災捍患神道應然所以血食一方功德在民也金陵南鄉某村農也一夕間天色慘淡陰風刺骨三更許聞場上人語嘈雜有萬馬奔騰之狀啟戶寂然又聞鑼聲隱隱若近若遠平明視田中禾稼踐踏有數十畝之濶異之時有某甲云昨夜有隣村中酒歸踉蹌間為峻山所阻思平日康莊那有峯巒間壁乃席地以觀其變旋見百步外有長髯神與一惡神往來格鬥似阻其入境者然喧呶竟夜向晨始去鄉民聞之僉謂疫神為社神驅逐集貲酬報相率不已噫疫神果降耶天災流行所在多有又豈社神能阻耶誣妄之言安知非某甲創以惑人耶然而不為所惑者蓋亦鮮矣。

陰兵之說原屬幻妄然亦有燐火成團排列如陣者若但聞金戈鐵馬以及呼號之聲則幻而又幻矣粵垣西城已卯入臘後晚間城中市廛悉聞空中神鬼號哭或如甲馬齊鳴喧呶



不已。新基渡頭其聲尤烈。聞之者皆惶然驚云。是歲正月下旬。廣州府番禺縣馮明府於某夜夢醒。遙聞署後街喧聲鼎沸。悚然而聽之。似有狂呼追殺者。又有哀號乞救者。人聲喧囂。無慮千百。呼眾起。聞皆同。飭役持械張燈前往彈壓。至則月明風靜。萬籟無聲。詢更役則若不知也。咸疑為夢。後耳鳴既寢。喧聲較前更厲。復往跡之。仍無影響云。俗傳陰兵每剪雞毛為鬼箭。遂以剪雞毛為陰兵確据。辛巳七月。閭門外某肉舖畜雞四。旋風一掃。四雞羣啼。棲於塼久。而不出。細審之。兩翅毛管截然各斬。互相驚述。皆謂陰兵經過。於是。有擊金器以驅逐者。有懸符以鎮壓者。有焚冥鏹以禳解者。嗚呼。陰陽一理。必謂陰世無兵。此膠柱鼓瑟論也。但見怪不怪。其怪自敗。無如愚夫愚婦。始終不悟耳。

神號鬼哭。俗人常言之。要皆誕詞耳。乃又有言佛哭者。則誕之至矣。金陵棲霞山向有千佛殿。蓋皆就山石鑿成之。大小坐立不一。其形惟居中大佛三尊。儼然丈六金身也。兵燹後。石佛雖存。殘敗已極。有善士集資裝金。莊嚴寶相。煥然一新。近傳石佛落淚。寺僧旋拭。旋落。班痕點點。形跡宛然。真耶偽耶。不可得而知矣。或殆神其說。以警動愚人耶。不然。佛亦何哭為哉。

世人崇祀神道。所以求保佑也。乃有神像亦未能自保者。如杭州一事。可異焉。杭郡向有水

德院設供真武帝君頗著靈異庚辰六月間神左右輒見有白蛇一條身短而巨蜿蜒不去焚香燭禱之始入坐下而後環叩於神擲得下下之筮語危竦不踰月夜半忽聞大聲一震神像俯仆於地如係人推倒者然五木形骸亦無破損里眾羣集觀之白蛇盤旋座右俄頃逝矣爰將神像扶立重裝脩焉吁以神之靈獨不能制一蛇耶而卒為其所仆豈真運數使然耶不然蛇亦何咎乎神而必仆之耶則神之無所為靈異者大率皆附會之語矣

旱魃為虐見於詩經此固不祥之物世所不經見者也己卯歲七月間光福山人彼此喧傳旱魃出世每逢星月交輝有一物出沒峯頂箕踞樹巔其形似人非人似鬼非鬼面目鬚髮不可諦視第覺周身上下皓如鉛堊頭上冠若仰盂常有白氣上冲霄漢山人眾口一詞謂自有此物及今兩月未有雨澤想此為厲耳魃為旱神俗謂鬼而僵屍者即為魃彼鬼也何靈能為厲乎殆亦旱象既成鬼故假之為厲耳若設有魃而即無雨則天子受權於魃也夫豈其然

宵小肆虐黑夜行竊心胆本虛因人而驚逸者其常乃有以畫幅之神而大相恐懼者奇矣蘇闔外許巷中某學究家闔室已寢某兀坐危樓觀書忽聞樓下有人吁然失聲五體投地東燭趨視則一梁上君子也倒暈牆角四肢俱冰氣息如絲急灌治始醒詢所由則云甫踰



垣入室取火燎望。猛見巨人赤面朱鬚紅絳靴。舉手搏擊。不知是神是鬼。故傾跌耳。先是某有硃砂鍾馗一幅。節近端陽。特加裝潢。是夕有弟子潑水於畫。張挂壁間。不意其能嚇賊也。蓋賊於倉皇恐懼之中。陡見此像。以偽疑真。故不覺魂魄奪耳。豈畫中鍾馗果有靈爽。若此哉。有告於予者。姑錄之以為談助。

神明感格。一誠可通。而籤其顯然者也。信之者謂實有可憑。疑之者謂虛而無據。要皆其機之先動。吉凶預乎其中焉。特視乎人之誠不誠耳。蘇州文復明瓦店居鴻園弄口。屢遭回祿。文姓多方禳災。熟香郡廟得一籤云。一春萬事苦憂煎。夏日營求始貼然。記否秋成冬至後。曾經騎鶴復腰纏。文姓疑懼。復至聖帝廟求一籤云。始謀恰是貪求計。到底應知力枉勞。百事未諧成畫餅。不如舍此別圖高。又乞籤於蔣廟云。前途陷阱設何深。不是天然是自尋。要脫須知脫不得。從今埋沒水沈沈。語意愈顯。合之大仙殿籤所云。從前作事總徒勞。纔見新春難已遭。百計營求難得意。何如守己莫心高。乃益疑懼。因思別徙。又於蔣廟乞籤。其辭曰。天之正數莫能逃。宇宙蕭蕭氣宇高。向夜月明淒慘處。一泓寒碧鎖澄寥。文姓乃不敢復問諸神。有何隱隱。人莫知之。神乃如出一口。奇矣。閩浙督署花園有大仙樓。聯額如林。靈應如響。每月朔望。洞啟圍門。外人始得瞻拜。每籤上刻一器皿繫以四字詩一首。始多陰晦難解事。

後則厯厯不爽人咸信之。閭門吊橋寶康布店開張未一旬遭回祿聞初開時肆主乞籤於武帝廟云。一紙官書火急催扁舟飛渡浪如雷。雖然目下多驚險。保汝平安去。復來故於失慎之時。急於後河廣呼駁船。裝載貨物。遂無損失。故得重復修造開肆。籤詞明顯其驗如神。人固謂籤之靈妙也。不知仍其人之誠心為之耳。故至誠而不動者。未之有也。於此益信。

香市開熱。南北京都各擅其盛。然亦有時而衰者。京師西有妙峯山。綿亙數千里。高不可以尋丈計。山腰有廟。路極紆徐。由南而上。計程四十里。廟貌巍巍。金碧輝映。廟供天仙聖母靈應素著。上而王公下而士庶奉之甚虔。每歲四月朔日開廟望日。始閉半月。中進香者西直門起終海澱南至大覺寺。數十里車殆馬煩。絡繹不絕。山上之路有二。北道距廟較近。徑逼仄下臨無際。自上而下。壁立千仞。步履固難。由上而下。臨崖勒馬。收束尤不易。偶一失足。粉首碎身。土人以轎椅便客。四人舁之以行。時亦有傾跌之患。然男女老少來往不息者。固不畏也。其南道則途坦而遠。相距五六里。即有茶棚小憩所。由上下而至磨刀石。而雙龍嶺而仙花洞。而大風口。而磕頭嶺。無不有茶棚淪茗焉。棚內供莊嚴寶相。聲聲清越。凡想頓消。過此睹廟門。路仍繚曲。往復不可以一蹴幾。檀煙繚繞。楮帛滿積庭除。香客皆屏足息氣。無敢少譁。云杭城天竺香市為西湖十八景之一。歲逢正月。却莊男女絡繹紛來。城中自清河坊